

ODLUKA

**O PRIHVATANJU ZADUŽENJA PO UGOVORU O FINANSIRANJU IZMEĐU
BOSNE I HERCEGOVINE I EVROPSKE INVESTICIJSKE BANKE (EIB) ZA
REALIZACIJU PROJEKTA „ELEKTRIČNA DISTRIBUCIJA BiH (2010-0562) –
IZGRADNJA SISTEMA PAMETNIH MJERENJA U ELEKTRODISTRIBUCIJI”**

Sarajevo, novembar 2014. godine

Na osnovu člana 40. stav 5. Zakona o dugu, zaduživanju i garancijama u Federaciji Bosne i Hercegovine ("Službene novine Federacije BiH", br. 86/07, 24/09 i 44/10) Predstavnički dom Parlamenta Federacije Bosne i Hercegovine na _____ sjednici održanoj _____ godine i Dom naroda Parlamenta Federacije Bosne i Hercegovine na _____ sjednici održanoj _____ godine d o n o s i

ODLUKU

O PRIHVATANJU ZADUŽENJA PO UGOVORU O FINANSIRANJU IZMEĐU BOSNE I HERCEGOVINE I EVROPSKE INVESTICIJSKE BANKE (EIB) ZA REALIZACIJU PROJEKTA „ELEKTRIČNA DISTRIBUCIJA BiH (2010-0562) – IZGRADNJA SISTEMA PAMETNIH MJERENJA U ELEKTRODISTRIBUCIJI”

I.

Prihvata se zaduženje Federacije Bosne i Hercegovine (u daljem tekstu: Federacija) po Ugovoru o finansiranju između Evropske investicijske banke (u daljem tekstu: EIB) i Bosne i Hercegovine (u daljem tekstu: BiH) za realizaciju Projekta Električna distribucija BiH (2010-0562) – Izgradnja sistema pametnih mjerenja u elektrodistribuciji u iznosu od 15.000.000,00 EUR za JP Elektroprivreda Bosne i Hercegovine d.d. Sarajevo.

II.

Sredstva kredita iz tačke I. ove Odluke koristit će se za realizaciju Projekta Električna distribucija BiH (2010-0562) – Izgradnja sistema pametnih mjerenja u elektrodistribuciji. Primarni cilj projekta je izgradnja i rekonstrukcija transformatorskih stanica s ciljem smanjenja tehničkih gubitaka električne energije i poboljšanja naponskih prilika, rekonstrukcija i izgradnja niskonaponskih mreža, nabavka i ugradnja obračunskih elektroničkih brojila za potrebe domaćinstava, koja imaju mogućnost daljinskog očitovanja utrošene električne energije, te daljinskog isključenja i uključanja potrošača sa svođenjem na postojeći AMR centar.

III.

Sredstva kredita iz tačke I. ove Odluke, odobravaju se Federaciji pod sljedećim uslovima:

- iznos kredita:..... 15.000.000,00 EUR
- rok otplate:..... 25 godina
- grace period:.....do 6 godina
- kamatna stopa:.....fiksna ili varijabilna, s fiksnim intervalom (dogovara se prije isplate tranše)
- dospijeća:.....godišnja ili polugodišnja rata u jednakim otplatama glavnice, u anuitetima
- iznos svake tranše:.....minimalno 5.000.000,00 EUR

IV.

Potvrđuje se da je razmatrana dokumentacija prihvatljiva za Federaciju, a posebno:

- Ugovor o finansiranju između EIB-a i BiH;
- Nacrt Supsidijarnog sporazuma između BiH i Federacije;

- Nacrt podugovora o finansiranju između Federacije BiH i JP Elektroprivreda BiH d.d. Sarajevo.

V.

Sredstva kredita iz tačke I. ove Odluke Federacija će na kreditnom osnovu prenijeti na JP Elektroprivreda Bosne i Hercegovine d.d. Sarajevo, koja je krajnji korisnik i dužnik po ovom kreditnom zaduženju.

U periodu implementacije Projekta, u budžetu Federacije nije potrebno osigurati finansijska sredstva za dodatno sufinansiranje Projekta.

VI.

Zadužuje se Federalno ministarstvo finansija-Federalno ministarstvo financija da sa JP Elektroprivreda Bosne i Hercegovine d.d. Sarajevo usaglasi i sklopi odgovarajući Podugovor o kreditu kojim će, u svrhu redovne otplate, definirati uslove vraćanja sredstava koja se prenose na kreditnom osnovu.

VII.

Daje se saglasnost za zaključivanje Supsidijarnog sporazuma između BiH i Federacije, kao i saglasnost za zaključivanje i usaglašavanje odgovarajućeg Podugovora o kreditu između Federacije i JP Elektroprivreda Bosne i Hercegovine d.d. Sarajevo kojim će se, u svrhu redovne otplate, definirati uslovi vraćanja sredstava koja se prenose po kreditnom osnovu.

Za potpisivanje Supsidijarnog sporazuma i Podugovora o kreditu, ovlašćuje se federalni ministar finansija - federalni ministar financija.

VIII.

Za realizaciju ove Odluke i izvještavanje zadužuju se Federalno ministarstvo finansija - Federalno ministarstvo financija, Federalno ministarstvo energije, rudarstva i industrije i JP Elektroprivreda Bosne i Hercegovine d.d. Sarajevo, svako u okviru svoje nadležnosti.

IX.

Implementacija Sporazuma iz tačke I. ove Odluke ne zahtijeva donošenje novih ili izmjenu postojećih zakona.

X.

Ova Odluka stupa na snagu narednog dana od dana objavljivanja u "Službenim novinama Federacije BiH".

O B R A Z L O Ž E N J E

Pravni osnov

Pravni osnov za donošenje ove Odluke sadržan je u članu 40. stav 4. Zakona o dugu, zaduživanju i garancijama u Federaciji Bosne i Hercegovine ("Službene novine Federacije BiH", br: 86/07, 24/09 i 44/10), koji propisuje pitanja vanjskog zaduženja Federacije i procedure za zajmove. Izmjenom Zakona o dugu, zaduživanju i garancijama u Federaciji Bosne i Hercegovine („Službene novine Federacije BiH“, broj: 44/10) u članu 40. stav 5. predviđeno je da Vlada Federacije Bosne i Hercegovine nakon prihvatanja nacrta kreditnog sporazuma i utvrđivanja Prijedloga odluke, istu dostavlja Parlamentu Federacije BiH na usvajanje.

Razlozi za donošenje

Donošenjem ove Odluke stvara se osnov za potpisivanje Supsidijarnog sporazuma između BiH i Federacije Bosne i Hercegovine, a potom i Podugovora o zajmu između Federacije i JP Elektroprivreda Bosne i Hercegovine d.d. Sarajevo, na osnovu kojeg će Federacija BiH sredstva zajma proslijediti JP Elektroprivreda Bosne i Hercegovine d.d. Sarajevo kao krajnjem dužniku i korisniku kredita predmetnog Projekta.

Sredstva zajma koristit će se za finansiranje Projekta "Električna distribucija BiH (2010-0562) – Izgradnja sistema pametnih mjerenja u elektrodistribuciji", koji podrazumijeva izgradnju i rekonstrukciju transformatorskih stanica s ciljem smanjenja tehničkih gubitaka električne energije i poboljšanja naponskih prilika, rekonstrukcija i izgradnja niskonaponskih mreža, nabavka i ugradnja obračunskih elektroničkih brojlara za potrebe domaćinstava, koja imaju mogućnost daljinskog očitovanja utrošene električne energije, te daljinskog isključenja i uključenja potrošača sa svođenjem na postojeći AMR centar.

Obrazloženje pojedinih tačaka

Tačka I. je nužna kako bi se prihvatilo zaduženje Federacije BiH kod Evropske investicijske banke.

Tačkom II. potvrđuje se namjena utroška sredstava kredita.

Tačkom III. precizirani su uslovi kredita.

Tačkom IV. potvrđuje se da je dokumentacija parafirana tokom pregovora sa Evropskom investicijskom bankom prihvatljiva za Federaciju BiH, što je uslov da Bosna i Hercegovina i EIB pristupe potpisivanju Ugovora o kreditu.

Tačkom V. se definira način implementacije Projekta, te da nije potrebno osigurati dodatna sredstva u Budžetu Federacije za ovu namjenu.

Tačkom VI. se definira obaveza Federalnog ministarstva finansija-Federalnog ministarstva financija da sa JP Elektroprivreda Bosne i Hercegovine d.d. Sarajevo usaglasi i sklopi odgovarajući Podugovor o kreditu.

Tačkom VII. daje se saglasnost za zaključivanje Supsidijarnog sporazuma o kreditu sa Bosnom i Hercegovinom i Podugovora o kreditu između Federacije i JP Elektroprivreda Bosne i Hercegovine d.d. Sarajevo i ovlaštenje federalnom ministru finansija - federalnom ministru financija da u ime Federacije potpiše iste.

Tačkom VIII. u okvirima nadležnosti definira se obaveza za realizaciju Odluke i izvještavanje.

Tačkom IX. se potvrđuje da za implementaciju Ugovora o zajmu i projektu nije potrebno donijeti nove ili izmijeniti postojeće zakone.

Tačka X. propisuje stupanje na snagu ove Odluke.